



**Samarbeidsavtale om**

**Nasjonal helseatlasteneste**

**mellom**

**Helse Vest RHF og Helse Nord RHF**



## 1. Partar

Samarbeidsavtalen er inngått mellom Helse Vest RHF og Helse Nord RHF.

## 2. Bakgrunn

Ei nasjonal helseatlasteneste skal gi betre kunnskap om variasjon i bruk og kvalitet av helsetenester. Tenesta skal presentere omfang, ulikskapar og utviklingstrendar innan spesialisthelsetenesta.

Helse- og omsorgsdepartementet (HOD) bad i føretaksmøtet i januar 2015 Helse Vest RHF og Helse Nord RHF om å samarbeide med Helsedirektoratet om å utvikle ei nasjonal atlasteneste for å setje lys på og analysere forbruk og variasjon av helsetenester<sup>1</sup>. I tilleggskokumentet til oppdragsdokumentet frå HOD i 2015<sup>2</sup>, er det mellom anna sagt at innsikt om variasjonar i forbruk av helsetenester skal nyttast i forbettringsarbeid i spesialisthelsetenesta.

Målgruppene for helseatlastenesta er:

- helsepersonell — for lokal kvalitetsforbetring
- brukarar av helsetenester — for kvalifiserte og informerte val
- leiarar og sjukehuseigarar —for styring
- politisk leiing — for nasjonal prioritering
- offentlegheita — for openheit og informasjon
- forskarar — for helsetenesteforskning

## 3. Føremål med avtalen

Avtalen skal bidra til samarbeid og samordning mellom Helse Vest RHF og Helse Nord RHF i arbeidet med å utvikle ei nasjonal helseatlasteneste i tråd med oppdraget frå Helse- og omsorgsdepartement.

Samarbeidet kan omfatte både utvikling av kunnskap om ulike datakjelder og metodar, og analyser av helsetenester, under dette diagnostikk, behandling, prosedyrar og andre resultat av forskning og analysar i feltet fordelt på ulike geografiske område. Det er m.a. viktig at det skjer ei samordning av val av tema, at felles krav til kvalitet og plattform blir utveksla og publisering og presentasjon blir gjort på felles nettstad i tråd med føringane i denne avtalen.

## 4. Avtaletid

Avtalen trådde i kraft frå 01.09.2016, og har med dette blitt revidert. Avtalen skal normalt gjelde for to år før den blir revidert. Innanfor avtaleperioden er det eitt års oppseiingstid for partane. Om ingen av partane varslar oppseiing eller ønskjer om endring innan slutten av perioden, blir avtalen automatisk ført vidare for ein ny periode på to år.

## **5. Forankring**

Helse Vest RHF og Helse Nord RHF peikar ut kvar sin kontaktperson for avtalen.

Helse Førde HF skal utføre oppdraget på vegne av Helse Vest RHF på same måte som Senter for klinisk dokumentasjon og evaluering (SKDE) utfører oppdraget for Helse Nord RHF. Helse Førde HF og SKDE står kvar for seg ansvarleg for den delen av Helseatlastenesta som den enkelte part har utarbeida og publisert.

Helsedirektoratet er ein samarbeidspart. Gjennom samarbeidsutvalet søker helseatlastenesta å etablere kommunikasjon med direktoratet.

## **6. Kostnader**

Helse Vest RHF og Helse Nord RHF dekker kvar for seg kostnadane knytt til eiga eining i helseatlastenesta. Dette gjeld mellom anna lønn, samarbeid med databehandlar, kontor, reiser og andre driftskostnader. Ved felles kostnader til dømes på grunn av felles nettstad skal utgiftene delast likt mellom dei regionale helseføretaka.

## **7. Innhald i nasjonal helseatlasteneste**

### **7.1 Analysar av omfang og variasjonar i bruk og kvalitet av helsetenester**

#### **7.1 a Innhald i publiserte helseatlas**

For kvart helseatlas (emneområde/tema) skal det som hovudregel i tillegg til kartframstilling, gjerast greie for bakgrunn for val av emneområde/tema, teoretisk rammeverk, metode og utval, og drøfting av resultat. Det skal vidare presenterast tabellar/figurar som framstiller forskjellige aspekt ved variasjon og utvikling over tid, og grunngje utval og drøfting/tolking av enkeltresultat. For helseatlas over mindre omfattande emneområde/tema kan ein vurdere å gjere framstillinga noko enklare. Kva geografisk område/nivå dataene skal presenterast på kan variere. Her må konfidensialitet vurderast.

#### **7.1 b Analysar og forskning for å forstå og forklare variasjonen**

SKDE og Helse Førde skal søke samarbeid omkring forskning i prosjekt der det er hensiktsmessig. Forsking vil være vesentleg for å kunne forklare observert variasjon.

### **7.2 Publisering**

#### **7.2 a Nettstad**

Kunnskap som er framkome gjennom Nasjonal helseatlasteneste skal publiserast på ein felles nettstad, uavhengig av kven som har utarbeida informasjonen. Per 2020 er adressa [www.helseatlas.no](http://www.helseatlas.no). Nettstaden skal vidareutviklast i samarbeid mellom SKDE og Helse Førde. På

nettstaden skal det gå fram at helseatlastenesta er eit samarbeid mellom Helse Vest RHF og Helse Nord RHF. Det skal i tillegg gå fram kven av partane som har utarbeida den enkelte del.

## **7.2 b Publiseringsverktøy**

Det same publiseringsverktøyet bør nyttast både i Helse Førde HF og hjå SKDE.

## **7.3 Samarbeid med andre analysemiljø**

Der det er naturleg kan einingane etablere samarbeid med andre helseatlas miljø til dømes Dartmouth Health Atlas Project i USA og the Wennberg Collaborative.

# **8. Samarbeidsutval**

Den Nasjonale helseatlastenesta er stasjonert på to stader. Dette blir sett på som ein styrke for tenesta både med omsyn til kompetanse og nettverk. For å sikre godt samarbeid mellom dei to einingane skal det vere eit samarbeidsutval med medlemmer frå SKDE og Helse Førde HF.

I tillegg til det formelle samarbeidet som fylgjer av mandatet til samarbeidsutvalet, vil det bli vektlagt at Helseatlastenesta sine to einingar skal halde fram med samarbeidet og erfaringsutvekslinga som er etablert.

## **8.1 Medlemmer og møter i samarbeidsutvalet**

Samarbeidsutvalet skal bestå av to personar frå Helse Førde HF og to frå SKDE. Utvalet kan invitere Helsedirektoratet eller andre inn etter behov.

Samarbeidsutvalet møtast ved behov, minst 3 gonger årleg, for gjensidig orientering og diskusjon av relevante problemstillingar. Helse Førde HF og SKDE skal dele på leiar og sekretærfunksjonane med ansvar anna kvart år.

## **8.2 Samarbeidsutvalet sine oppgåver**

Samarbeidsutvalet skal

- bidra til at Nasjonal helseatlasteneste blir driven i samsvar med oppdraget frå HOD og i tråd med denne samarbeidsavtalen
- bidra til at helseatlastenesta stadig utviklar seg i samsvar med føringar og behov for endring
- bidra til kunnskapsdeling i helseatlastenesta
- sikre at den Nasjonale helseatlastenesta har eit «felles ansikt utover»
- drøfte emneområder for nye helseatlas og sikre at det ikkje blir gjort «dobbeltarbeid» ved Helse Førde HF og SKDE, men at arbeida utfyller kvarandre
- bidra til at tenesta er brukarvenleg

## 9. Informasjon om helseatlastenesta

Ved presentasjonar og skriftleg informasjon til dømes i media, på konferansar, i møter mm, skal det, der det er naturleg, gå fram at tenesta er eit samarbeid mellom Helse Vest RHF og Helse Nord RHF, minst gjennom felles logo for helseatlastenesta.

## 10. Ressursar og kompetanse


Helse Vest RHF og Helse Nord RHF har begge eit sjølvstendig ansvar for at Helseatlastenesta har tilfredsstillande ressursar til drift av tenesta ved høvesvis Helse Førde HF og SKDE.

Helseatlastenesta vil ha nytte av kompetanse innan fleire fagområde. Dei to einingane må ha brei samla kompetanse, og kan nytte kvarandre sin kompetanse på tvers.

## 11. Øvrige vilkår

Partane er gjensidig forplikta til å følgje opp avtalen. Usemje og eventuelle konflikhtar skal takast opp i samarbeidsutvalet. Dersom usemja ikkje kan løysast på dette nivået, skal den bringast inn for dei regionale helseføretaka.

Dato: 24/9-20



Inger Cathrine Bryne  
Adm. direktør  
Helse Vest RHF



Cecilie Daae  
Adm. direktør  
Helse Nord RHF



### Referansar:

1. Protokoll frå føretaksmøte i Helse Vest RHF 07.01.2015

<https://www.regjeringen.no/contentassets/640608a354a442cf986d22a83c3b0ee1/protokollhelsevestrhf07012015.pdf>

2. Tillegg til oppdragsdokumentet 2015

<https://www.regjeringen.no/contentassets/bd8a11644b744dec8a8dc452794000e4/tilleggoppdrag2015.pdf>

